

KPÉDÉLÉ JÒVÁNÌ

Kpédélé bà cu wáràgà mì Jòvání

Có mì Mbírì gí tí 'duù gí

¹ 'Bí i náa yí táánò sàà kuu tí kùro bà suu to tí nó, náa ze 'di kòcò wó gí, ze delè gii ñò yí ta 'dóó ɾo ze gí, ze ñò yí gí, ze delè gii tee 'bì ze mítí wó gí, i tí ñò náa ndoo kpónó kèjì gí bà 'dè có gítí nó a Có, tí 'Válá.

² Ta o tí nó táánò náa 'Válá tí ñò tù ta bà tí wó nó, ze ñò yí gí; tacó énnò, ze kù 'dè nó a yúcó gítí wó jì yo. Ze kù ma nó a có gítí 'Válá ñìnó mbe cee lá, táánò mbe kù dù a i mì ndú ta Buù, náa à gii tubà tí wó jì ndoo nô.

³ Ze kù ma nó a có i ñìnó náa ze ñò ta ɾo ze gí nó jì yo. Ze delè kù 'vanda jì yo nó a ndi ndâ có ñìnó náa ze 'di gí nô. Tacó wàa, yo 'ví nì ta kaà á ta ze, á go bà nì kaà mì ze á ta ndâ Buù ta 'Viì mì wó tí Jézù, tí Bìndi-Mbírì nô.

⁴ Ze kù cu wáràgà tí nó jì yo tacó bà tò muu líkí'o tí nó tí ze nô.

Bà ñò nó gbí ngba'o

⁵ Có tí nó náa ze kù ma jì yo éno máa, Mbírì a Ngba'o; 'dí'di'o tí bàndò tí nó ta yí tí nó ngé gí wálá, nó, a có náa a 'Viì mì wó tí Mbírì ká 'dè jì ze.

⁶ Ndoó má 'dè có máa ndoo a ndâ kómbe wó, káa ndoo kù 'vala gbí 'dí'di'o, ndoo kù 'dè a 'véře, ndoo delè kù 'vala me jáá lá.

⁷ Káa ndoo má kù 'vala gbí ngba'o, á go ñinó náa yí tí Mbírì kù 'vala gbí ngba'o nó, gbí éno máa, có gbí njembí ndoo 'dáá ká gbaànjé, delè mbelè Jézù tí 'Viì mì wó tí Mbírì caka ndâ vò i mì ndoo 'dáá gî gî.

Bà njèè gbí tí ndoo ta vò i

⁸ Ndoos má 'dè có éno máa, vò i mì ndoo wálá, gbí éno máa, ndoo kù ee a ndi tí ndoo. Ndoos delè kù biya a bà ùnje gítí yúco.

⁹ Káa ndoo má yù gbí ndâ vò i mì ndoo ji Mbírì, yí bà je à-cee-gî ji ndoo gítí ndú 'dáá gî gî. Tacó yí me mbe 'buuku muu i mì 'duù lá, yí delè me mbe bàkà i co tende 'do tí ndi ngo nje wó lá.

¹⁰ Ndoos má 'dè có éno máa, ndoo jé bàkà vò i lá, gbí éno máa, ndoo kù go a 'vèrè tí Mbírì, gbí delè éno máa, có mì wó gbí njembí ndoo wálá.

2

Bìndi-Mbírì tí mbe koni ndoo

¹ Ye kù cu wáràgà tí nó ji yo, tacó wàa yo 'ví bàkà vò i lá, ndâ víi 'viì mì ye. Káa 'bí 'duù 'do gbí òkò tí yo má bàkà vò i, mbe tí muu ndoo kùro Bu ndoo kuu tí. Yí a Jézù tí Bìndi-Mbírì, tí 'duù jáá kùro Mbírì.

² Yí tí Bìndi-Mbírì a 'duù tí nó náa Mbírì je à-cee-gî gítí ndâ vò i mì ndoo ta rẹ̀ mì wó. Káa Mbírì je à-cee-gî me ká gítí ndâ vò i mì ndoo cuki lá, yí delè je gítí ndâ vò i mì ndâ 'duù muu to tí nó 'dáá gî.

Yo 'di ndâ có mì Mbírì

³ Ndoò má kpòlò tí ndâ có mì Mbírì gî, gbí éno máa, ndoo ò yí ni gî ta kponje gítí wálá.

⁴ Duù má 'dè có éno máa yì ò Mbírì ni gî, káa yí kpòlò tí ndâ có mì Mbírì lá, 'duù tí ò a mbe 'vére.

⁵ Duù má kpòlò tí ndâ có mì Mbírì gî, yí a 'duù mbe zè Mbírì nìkì ta njembí wó gbaànjé.

⁶ Duù má 'dè có máa yì kù 'vala ta rẹ̀ mì Mbírì, 'duù tí ò 'ví 'vala káa ò bà 'vala ndò mì Bìndi-Mbírì.

⁷ Có tí nó náa ye kù cu mí gbí wáràgà jì yo nó me ngú có lá, ndâ nambe ye. Ye kù cu jì yo a ká có, náa yo 'dì sàà 'do tí o bà 'bìtá bà suu to tí nó gî.

⁸ Káa à má gbí 'bí òa kpokèjì, ye kù cu jì yo a ngú có. À kù ò ngú có tí ò ni tí yúco mítí Bìndi-Mbírì, à delè kù ò ni mítí yo. Tacó bà 'dí'di'ò kpónó kù dá-da, cèe ngba'ò kpónó kù tòngbaà.

⁹ Duù má 'dè có máa yì kù 'vala gbí ngba'ò, káa yí dù kù sogo ná'vìndí wó, 'duù tí ò kù 'vala gbí 'dí'di'ò kálásè.

¹⁰ Duù má zè ná'vìndí wó nìkì maa, 'duù tí ò kù 'vala a i gbí ngba'ò, ta 'bí i mbe sì yí 'ví bèè rọ Mbírì ò wálá.

¹¹ Káa 'duù mbe kù sogo ná'vìndí wó kù 'vala a i gbí 'dí'di'ò, yí kù ò ká dúú éno gí kà gbí 'dí'di'ò, yí ò 'dóó dúú kpokèjì bà ya yí lá, tacó 'dí'di'ò 'di rọ wó gî.

¹² Ye kù cu wáràgà tí nó jì yo tí ndâ 'viì mì ye, tacó Mbírì je à-cee-gî jì yo gítí ndâ vò i mì yo ta rẹ̀ mì Bìndi-Mbírì gî.

¹³ Ye kù cu wáràgà tí nó jì yo tí ndâ bu ndâ 'viì, tacó yo ò 'duù tí nó mbe kù 'vala 'do tí o bà 'bìtá

bà suu ndâ i nó gî. Ye kû cu wáràgà tí nó ji yo tí ndâ 'viì-'dakò, tacó yo kpò nje Vò-'duù-tí-nò gî.

¹⁴ Ye kû cu wáràgà tí nó ji yo tí ndâ bu ndâ 'viì, tacó yo òò 'duù tí nó mbe kû 'vala 'do tí o bà 'bità bà suu ndâ i nó ni gî. Ye kû cu wáràgà tí nó ji yo tí ndâ 'viì-'dakò, tacó wotí kuu tí yo, delè tacó có mì Mbírì kuu gbí njembí yo, tacó yo kpò nje Vò-'duù-tí-nò gî.

¹⁵ Yo 'ví toko nambeè ta to tí nó lá, yo delè 'ví tee njembí yo mítí ndâ i muu to tí nó lá. Tacó 'duù má zèè to tí nó ta 'bì wó sósò'ò, yí bà kù a 'bí 'bì wó tacó bà zèè ta Buù?

¹⁶ Tacó ndâ i muu to tí nó 'dáá gî: ndâ vò i ònó ta go ndú tí ndâ 'duù, ta ndâ i ònó ta go bà òò ndú ta ọò ndâ 'duù tí ndú, ta ndâ i ònó mbe kû mba ndâ 'duù muu to tí nó 'dáá gî, me ndâ i mì Buù lá, ndú a ndâ i mbe 'do muu to tí nó;

¹⁷ káa to tí nó, ta ndâ i muu to tí nó 'dáá gî ta go ndú tí ndâ 'duù nó, a ndâ wíri, káa 'duù ònó mbe kû bàkà go có mì Mbírì nó bà cì wálá.

Yo kpolo tí yo 'do tí ndâ sú bìndi-Mbírì

¹⁸ Ndâ 'viì mì ye, ndòngbú o kpónó dooko gî. Áá táánò 'dè có ji yo gî, máa, mbe jòò gbí có ta Bìndi-Mbírì kpokèjì, káa ndâ mbe kû jòò gbí có ta Bìndi-Mbírì kpónó yee gî; tacó éno, ndoo òò ni éno máa, ndòngbú o yee gî mítí bà gí ndâ mbe kû jòò gbí có ta Bìndi-Mbírì.

¹⁹ Ndâ 'duù tí nó mbe kû jòò gbí có ta Bìndi-Mbírì nò oloko 'do ká kuu gbí òkò tí ndoo, káa ndú táánò me ndâ 'duù mì ndoo lá; tacó ndú táánò má a ndâ 'duù mì ndoo, ndú bà dù ta ndoo gî. Káa bà oloko ndú á 'do tí ndoo nò kû tùbà

ngbárángà'i éno máa ndú me ndâ 'duù mì ndoo lá.

²⁰ Káa yo kpónó 'dáá gî a ndâ duù ñinó náa Bèri-mì-Mbíri gî gî muu yo gî; à má éno, yo 'dáá gî ñò yúco ni gî.

²¹ Ye kû cu wáràgà tí nó ji yo me tacó máa yo ñò yúco ni lá ñò lá, yo ñò yúco ni sàà gî, yo delè gii ñò ni gî máa, yúco jé jò 'vére lá.

²² Káa mbe 'vére a 'di? Mbe 'vére a 'duù ñinó mbe 'dè có máa, Jézù me Bìndi-Mbíri lá. Yí a mbe kû jòò gbí có ta Bìndi-Mbíri. Yí a mbe 'boo Buù, yí delè a mbe 'boo 'Viì.

²³ Tacó 'duù má biya bà ùnje gítí 'Viì gî, gbí éno máa yí biya bà ùnje gítí Buù gî, tacó 'duù má ùnje gítí 'Viì gî, yí ù ñò a nje gítí Buù gî.

²⁴ Yo kpolo tí có tí nó náa yo 'di nó 'do tí bà 'bità mí gbí njembí yo. Yo má kpolo tí có tí ñò náa yo 'di ñò 'do tí bà 'bità mí gbí njembí yo gî, yo bà 'vala ta o 'dáá gî toko ta ndâ 'Viì ta Buù gî.

²⁵ Káa ñinò a i tí nó náa à káa 'dóó Bìndi-Mbíri ká ci ndoo gítí , tí 'válá ñinó mbe cee lá nô.

²⁶ Ye kû cu wáràgà tí nó ji yo a i tacó tí ndâ 'duù tí nó mbe kû paa ta bà co ta yo tí lókó-loko kpokèjì nô.

²⁷ Káa à má gítí yo, Bìndi-Mbíri je Bèri ji yo gî. Káa Bèri mì wó má kuu gbí njembí yo, nderè bà ñibà i mì 'bí 'duù ji yo wálá. Tacó Bèri kû ñibà ndâ i 'dáá gî ji yo, káa Bèri kû ñi a bà yúco, yí ñibà 'vére lá. À má éno, yo 'di có mì Bèri, wàa yo 'ví dù toko ta Bìndi-Mbíri.

²⁸ Nògí, yo 'vala ta rè mì Bìndi-Mbíri, ndâ 'viì mì ye, tacó wàa, gúku wó 'ví bàkà ndoo ta o bà

gì yí lá, ndoo delè 'ví 'vìsì kapí ndoo gítí wó ta nò ta o bà gì yí lá.

²⁹ Yo má nò ni gî máa, Mbírì a 'duù jáá, yo delè bà nò ni gî máa, 'duù nìnó mbe kù co tí jáá kpokèjì nó a 'vii mì Mbírì.

3

Bà 'vala go ndâ 'vii mì Mbírì

¹ Yo nò káa tó ña bà zè tí tí nó náa Buù kù zè ta ndoo náa rẹ ndoo tí kpónó a ndâ 'vii mì Mbírì nó gi. Káa à má ta bà 'dè ta yúco, ndoo a ndâ 'vii mì Mbírì. Ndâ 'duù muu to tí nó nò ndoo ni lá, tacó ndú nò Mbírì ni lá.

² Ndoò kpónó a ndâ 'vii mì Mbírì, ndâ kpóló-kpòlo kómbe ye. Káa có nìnó mbe si ndoo kù koṛo có ká wii nó a nìnó máa, ndoo wúnò bà dù tí ndâ yè wè? Káa ndoo nò ni gî máa, ndoo wúnò bà dù go Bìndi-Mbírì ta o bà gì yí. Ndoò bà nò yí ta kábà tí wó, ta 'bí i mbe gboo 'do tí wó wálá.

³ 'Duù mbe kù koṛo có lli mítí Bìndi-Mbírì kù si njembí wó 'ví dù ngbárángà'i, á go njembí Bìndi-Mbírì.

Bà mò tí 'do tí vò i

⁴ Vò i mì 'duù nìnó mbe kù bèè ɾo Mbírì nó a bà nò yúco ni lá, tacó bà bèè ɾo Mbírì a bà nò yúco ni lá.

⁵ Yo nò ni gî máa, Bìndi-Mbírì táánò gì a i tacó bà toṛo ndâ vò i mì ndâ 'duù, káa vò i gbí njembí wó gbaànjé wálá.

⁶ À má éno, 'duù mbe kù 'vala ta rẹ mì Bìndi-Mbírì bèè ɾo Mbírì lá; 'duù mbe kù bèè ɾo Mbírì nò Bìndi-Mbírì ta ɾo wo lá, yí delè nò yí ni lá.

⁷ Yo si 'bí 'duù 'ví eendi yo lá, ndâ víí 'viì mì ye. 'Duù ñìnó mbe kù bàkà i dú nó a 'duù jáá kùro Mbíri, á go Bìndi-Mbíri tí 'duù jáá kùro Mbíri.

⁸ 'Duù má waa 'do tí bà bèè ro Mbíri lá, 'duù tí nó a 'duù mì Gba-vò-i, tacó 'do tí o bà 'bità bà suu to tí nó síí gbí bà bèè ro Mbíri mì Gba-vò-i wálá. Káa 'Viì-mì-Mbíri táánò gí gí muu to tí nó a i tacó bà zi nje ndâ nèté mì Gba-vò-i.

⁹ 'Duù ñìnó náa a Mbíri ká jò yí nó bèè rò Mbíri lá, tacó mbelè Mbíri kuu gbí mbelè wó. Yí bèè rò Mbíri lá, tacó a Mbíri ká jò yí.

¹⁰ 'Bè gbí òkò tí ndâ 'viì mì Mbíri ta ndâ 'viì mì Gba-vò-i kuu ngbárángà'i nô: 'Duù ñìnó mbe bàkà i ñìnó dú nó lá, me 'viì mì Mbíri lá. 'Duù ñìnó delè mbe zè ndâ ná'vindí wó ñìkì lá nó, me 'viì mì Mbíri lá.

Yo kpolo tí ndâ có mì Mbíri

¹¹ Có tí nó náa yo táánò 'di kpédélé'i nó a có tí nó máa, ndoo 'ví zè tí ndoo gbí òkò tí ndoo ñìkì maa nô.

¹² Ndoos 'di me có gítí bà dù go 'dakò tí nó tí Kàyínò, tí 'duù mì Vò-'duù-tí-nò, táánò mbe waa tàkòcò ná'vindí wó Àbélè nó, lá.

¹³ Ndâ 'duù má kù sogo yo, yo 'ví si tí ngú i lá, ndâ ná'vindí ye, nje yo delè 'ví 'dèè gítí lá.

¹⁴ Ndoos òò ni gí máa, ndoo co 'do gbí ku gí gbí 'válá gí. Kponje gítí có tí nó wálá, tacó ndoo kù zè ndâ ná'vindí ndoo ñìkì maa. 'Duù mbe kù sogo ndâ ná'vindí wó kù 'vala gbí ku.

¹⁵ 'Duù mbe kù sogo ndâ ná'vindí wó a mbe zi ku, káa yo òò ni gí máa, 'válá ñìnó mbe cee lá nó mì mbe zi ku wálá.

16 Ndoo kù ò bà zè tí nìkì maa ni mítí bà cì Bìndi-Mbírì tacó tí ndoo. À má éno, kózò tí ndoo delè 'ví cì tacó tí ndâ ná'vìndí ndoo.

17 'Bí 'duù ta ndâ i kuu mì wó muu to tí nó má ò 'bí ná'vìndí wó ta yé tí wó káa yí gí biya có gítí bà konì yí gí, có gítí bà zè Mbírì nìkì maa bà dù gbí njembí 'duù tí nó ta ò kpokèjì ngàyi?

18 Nambeè-nje me cèe nambeè lá, ndâ víi 'vii! Cèe nambeè a bà zè tí nìkì maa náa à kù ò ni mítí cè bà bàkà i mì ndoo.

19 Bà bàkà nèté gítí nambeè a i mbe kù si ndoo 'ví ò ni éno máa, ndoo kù co tí kpokèjì mì yúco. Njìno a i mbe si njembí ndoo 'ví dù lèè kùro Mbírì.

20 Káa njembí ndoo kpétí má waa có mítí ndoo, ndoo ò ni gí máa, Mbírì me gbolò ndii njembí ndoo gí. Yí delè ò ndâ i gbaànjé-gbaànjé ni gí.

21 Njembí ndoo má volo ndoo lá, nderè bà cì gúku mì ndoo kùro Mbírì wálá.

22 Yí kù je ndâ i njìno 'dáa gí náa ndoo kù yù 'do tí wó nó ji ndoo tacó ndoo kù 'di ndâ có mì wó, ndoo delè kù 'vala go có tí nó gbí njembí wó nò.

23 Ndâ có mì wó náa yí 'dè ji ndoo nò éno máa: Ndoò 'ví ùnje gítí 'Vii mì yì Jézù tí Bìndi-Mbírì, wàa ndoo delè 'ví zè ndâ 'bí ka ndoo nìkì maa jé ká go có tí nó náa Bìndi-Mbírì 'dè ji ndoo nò.

24 'Duù má 'di ndâ có tí nó gí, 'duù tí nó kù 'vala gbí njembí Mbírì. Mbírì delè kù 'vala gbí njembí 'duù tí nó. Ndoò kù ò yúco tí nó ni 'do tí Bèrì tí nó náa Mbírì je yí ji ndoo nò.

Ndâ yúcó Bèri ta ndâ sú bèri

¹ Yo tee njembí yo mítí ndâ bèri sàkàmàà éno lá, ndâ tó 'duù mì ye. Yo pà gbí ndú pá-pà tacó bà 'de ndâ ñìnó mbe gí 'do mì Mbírì nò. Tacó ndâ sú mbe 'dòkò có mì Mbírì kpónó me mbè kuu muu to tí nò.

² Yo bà ñò ndâ bèri ñìnó 'dáá gî mbe gí 'do mì Mbírì nó ni mítí bà ùnje mì ndú máa, Jézù tí Bìndi-Mbírì gí tí 'duù gí muu to tí nò.

³ Káa ndâ bèri ñìnó mbe kù 'dè có máa, Jézù gí me tí 'duù lá nó, a ndâ bèri mì 'Duù tí nó tí mbe kù jòò gbí có ta Bìndi-Mbírì, náa àá táánò ci yo máa yí kèjì nò. Yí kpónó kuu muu to tí nò.

⁴ Yo kpò muu ndâ sú mbe 'dòkò có mì Mbírì nò gî, ndâ víi 'viì mì ye. Tacó yo gí 'do mì Mbírì, káa wotí tí Bèri tí nó mbe kù dù gbí njembí yo nó, ndii wotí tí bèri tí nó mbe dù gbí njembí ndâ 'duù mbe kù 'vala muu to tí nó nó gî.

⁵ Ndú a ndâ 'duù mì to tí nò; tacó éno, ndâ 'duù muu to tí nó kù sè tù ndú tí ndâ có mì ndú, tacó ndú kù 'dè có a i gítí ndâ i muu to tí nò.

⁶ Káa ndoo a ndâ 'duù mì Mbírì, tacó éno, ndâ 'duù ñìnó mbe ñò Mbírì ni gî nó kù sè tù ndú tí ndâ có mì ndoo, káa ndâ 'duù ñìnó mbe ñò Mbírì ni lá nó kù biya bà 'di có mì ndoo. Ñìnò a kpokèjì bà ñò 'bè gbí òkò tí ndâ Bèri mì yúcó ta ndâ sú bèri ni ká nò.

Mbírì a tó bà zè tí

⁷ Ndoò zè tí ndoo gbí òkò tí ndoo nìkì maa, ndâ tó 'duù mì ye. Tacó tó bà zè tí gí 'do mì Mbírì, tacó 'duù ñìnó mbe kù zè ndâ 'bí ka wó nìkì maa nó, a 'viì mì Mbírì, yí delè ñò Mbírì ni gî.

⁸ 'Duù ònó ta tó bà zè tí gbí njembí wó wálá nó, ò Mbíri ni lá, tacó Mbíri a tó bà zè tí.

⁹ Mbíri túbà bà zè ndoo mì wó òkò maa ji ndoo ta o tí nó náa yí tuu ta gbèe 'Viì mì wó gí muu to tí nó, tacó wàa, ndoo 'ví 'de ta 'wálá ta rẹ wó ò.

¹⁰ Njìnò a tó ò bà zè tí tí nó náa ye kù 'dè có gítí ò. Ye kù nì me tó bà zè Mbíri mì ndoo lá. Ye kù nì a tó bà zè ndoo mì Mbíri ta o tí nó náa yí tuu ta 'Viì mì wó, wàa à 'ví waa mbelè wó tacó bá ọọ ta ndá vò i mì ndoo ò.

¹¹ Mbíri zè ndoo òkò ngé ma, ndá tó 'duù mì ye; má éno, ndoo delè 'ví zè ndá 'bí ka ndoo òkò maa.

¹² 'Bí 'duù jé ta gbèe ri mbe ò Mbíri ta ọ wó wálá. Káa ndoo má kù zè tí ndoo gbí òkò tí ndoo òkò maa, Mbíri bà bàkà kudu mì wó mí gbí njembí ndoo, bìndi yí bà zè ndoo òkò ta kábà .

¹³ Ndoò bà ò ni éno máa, kudu mì ndoo kuu gbí njembí Mbíri, delè kudu mì Mbíri kuu gbí njembí ndoo á mítí bà je 'dóó Bèri mì wó tí Mbíri ji ndoo.

¹⁴ Ze ò ta ọ ze, ze delè gii 'dè có gítí ji ndá 'bí 'duù máa, Buù tuu 'Viì mì wó tí mbe njaanga wú 'do tí miiri ndá 'duù muu to tí ò.

¹⁵ 'Duù má 'dè có ta nje wó éno maa, Jézù a 'Viì-mì-Mbíri gí, gbí éno máa, Mbíri bàkà kudu mì wó mí gbí njembí 'duù tí ò gí. 'Duù tí ò delè bàkà kudu mì wó mí gbí njembí Mbíri gí.

¹⁶ Ze ò tó bà zè ndoo mì Mbíri ni gí, ze delè gii ùnje gítí gí. 'Duù ònó mbe kù zè ndá 'bí ka wó òkò maa nó, kù 'wala a i ta rẹ mì Mbíri. Mbíri delè kù dù gbí njembí ò 'duù tí ò.

¹⁷ Káa ndoo 'ví zè tí ndoo gbí òkò tí ndoo òkò

ta yúco; tacó wàa, njembí ndoo wúnò 'ví mù ta gúku ta Rì bà waa có lá, tacó ndoo kù 'vala muu to tí nó go bà 'vala ndò mì Bìndi-Mbíri.

¹⁸ Tó bà zè tí má kuu gbí njembí 'duù, gúku tí wó wálá. Káa cèe tó bà zè tí kù mòkò gúku gí sè 'do gbí njembí 'duù, tacó mbe gúku a 'duù ñinó mbe kù koṛo có máa, àa bà waa có mítí yì nò; mbe gúku delè a 'duù ñinó ta cèe tó bà zè tí gbí njembí wó wálá nò.

¹⁹ Ndoò kù zè Mbíri ñikì maa, tacó a yí ká 'bità bà zè ndoo ñikì maa kùro.

²⁰ 'Duù má 'dè có éno máa, yì zè Mbíri ñikì ma, káa yí kù sogo ná'vindí wó, 'duù tí nò a mbe 'vére. Tacó 'duù ñinó mbe zè ná'vindí wó náa yí kù ñò yí ta ro wó nó ñikì lá, bà 'de wotí gítí bà zè Mbíri náa yí ñò yí ta ro wó lá nó ñikì wálá.

²¹ Có mì Mbíri náa yí 'dè jì ndoo éno máa, 'duù má zè yì tí Mbíri ñikì maa, yí delè 'ví zè ná'vindí wó ñikì maa.

5

¹ 'Duù má ùnje éno máa, Jézù a Bìndi-Mbíri gí, 'duù tí nò a 'viì mì Mbíri. 'Duù má zè bu 'viì ñikì maa, yí delè zè 'viì mì 'duù tí nò ñikì maa.

² Ndoò bà ñò ni éno máa, ndoo kù zè ndâ 'viì mì Mbíri ñikì maa ni mítí bà zè Mbíri ñikì maa mì ndoo, delè mítí bà 'di ndâ có mì wó mì ndoo,

³ tacó a bà zè Mbíri ñikì maa ká kù si ndoo 'ví 'di ndâ có mì wó.

⁴ Tacó ndâ 'viì mì Mbíri 'dáá gí kpò nje ndâ vò i muu to tí nó gí. A bà tee njembí ndoo mítí Bìndi-Mbíri ká je wotí bà kpò nje ndâ vò i muu to tí nó jì ndoo.

⁵ A 'di ká bà co gbí ò ndâ 'duù muu to tí nó? À káa 'duù ònó mbe ùnje éno máa, Jézù a 'Viì-mì-Mbíri gî, ká bà co gbí ò ndâ 'duù muu to tí nó.

Bà tee njembí mítí Mbíri

⁶ Jézù tí Bìndi-Mbíri táánò gí ta ngo, yí delè gí ta mbelè. Yí gí me ká ta ngo cuki lá, yí gí ta ngo, yí delè gí ta mbelè. A Bèri-mì-Mbíri ká 'dè yúco tí nó, tacó Bèri-mì-Mbíri a yúco.

⁷ À má éno, muu ndâ mbe 'dè yúco ta'ô:

⁸ gbaànjé a Bèri-mì-Mbíri, só a ngo, ta'ô a mbelè, káa ndú 'dáa ta'ô 'dè káa gbèe có.

⁹ Ndoò má ùnje gítí có mì ndâ 'duù gî, có mì Mbíri a gbolò có mbe ndii có mì ndâ 'duù gî, káa ònó a yúco mì Mbíri náa yí kú 'dè gítí 'Viì mì wó.

¹⁰ 'Duù má ùnje éno máa, Jézù a 'Viì-mì-Mbíri gî, yúco tí nó kuu gbí njembí wó. Káa 'duù má biya bà ùnje gítí 'Viì-mì-Mbíri gî, 'duù tí nó kú go a 'verè tí có mì Mbíri, tacó yí biya bà ùnje gítí yúco tí nó náa Mbíri 'dè gítí 'Viì mì wó tí Mbíri nó gî.

¹¹ Yúco tí nó éno máa, Mbíri je 'válá ònó mbe cee lá nó jì ndoo gî. Káa rẹngbó 'válá tí nó a 'Viì mì wó tí Mbíri.

¹² 'Viì-mì-Mbíri má kuu ta 'duù, 'válá kuu ta 'duù tí nó. Káa 'Viì-mì-Mbíri má ta 'duù wálá, 'válá ta 'duù tí nó wálá.

'Válá ònó mbe cee lá nó

¹³ Ye cu ndâ có tí nó 'dáa gî jì yo tí ndâ mbe ùnje gítí 'Viì-mì-Mbíri, tacó wàa yo 'ví ònó tí ni éno máa, 'válá ònó mbe cee lá nó kuu ta yo.

14 Gúku bà rò tíyò kùro Mbírì tí ndoo wálá, tacó ndoo ò ni gî máa, ndoo má 'deke tí ndoo ji yí tacó 'bí i ònó náa yí ò ni gî máa à 'vii ta ndoo gî nó, yí bà je ji ndoo gî.

15 Káa ndoo má ò ni gî máa, yí kù sè tù wó tí ndoo ta o i tí nó náa ndoo má kù yù i 'do tí wó nó, ndoo delè ò ni gî, máa yí je i tí nó náa ndoo yù ò ni gî.

16 'Duù má ò ná'vindirí wó kù bàkà vò i ònó náa à me ònindí ku lá nó, yí 'ví 'deke tí wó ji Mbírì, wàa Mbírì bà 'vala yí gî, náa vò i mì wó ò má me vò i ònindí ku lá nó. Tacó ndâ 'bí vò i a ndâ vò i ònindí ku, káa ye kù 'dè me có máa yo 'ví 'deke tí yo ji Mbírì tacó ndâ vò i ònindí ku nó lá.

17 Bà bàkà ndâ i ònó 'dáa gî mbe 'vii rò 'bá mì Mbírì lá nó a vò i káa ndâ vò i 'dáa gî me ndâ vò i mbe kù tè'è tí ku gí 'bá lá.

18 Ndoò ò ni gî máa, 'duù ònó tí 'vii mì Mbírì nó bà nanaka muu wó míti bà bàkà vò i dúú kù ya tí nó wálá, tacó 'Vii-mi-Mbírì kù tí muu wó, tacó wàa Vò-'duù-tí-nò 'ví gàà yí lá.

19 Ndoò ò ni gî máa, ndoo a ndâ 'duù mì Mbírì, káa sè ndâ 'duù muu to tí nó 'dáa gî a ndâ i-tà-tàmà mì Vò-'duù-tí-nò.

20 Ndoò delè ò ni gî, máa, 'Vii-mi-Mbírì gí gí, yí delè je muu tacó bà ò yúco Mbírì ni ji ndoo gî. Ndoò kù 'vala ta rẹ̀ mì yúco Mbírì, ndoo delè kù 'vala ta rẹ̀ mì Jézù tí Bindi-Mbírì, tí 'Vii-mi-Mbírì. Ònò a 'válá ònó mbe cee lá nò.

21 Yo kpolo tí yo 'do tí ndâ sú mbírì, ndâ 'vii mì ye.

Ndogo
Ndogo: Ngú bà toko nambeè mì Mbìrì ta ndâ 'duù
New Testament

copyright © 2001 Wycliffe Bible Translators, Inc.

Language: Ndogo

Contributor: Wycliffe Bible Translators, Inc.

All rights reserved.

2025-05-16

PDF generated using Haiola and XeLaTeX on 16 May 2025 from source
files dated 16 May 2025

14424ae9-b5af-591e-814e-49316d8d74aa